

quando parerà a questo Conseio, et in questo mezo sier Hironimo da Canal governor di la quinquere monte su la galla del proveditor Pexaro, et che la quinquere monte vengi a disarmar sicome fu preso in questo Conseio.

Et sier Zuan Antonio Venier savio a Terraferma, sier Zuan Zane, sier Anzolo Michiel, savii ai Ordeni, volleno che'l dito proveditor da esser electo vadi termine 15 zorni a montar su la galla del proveditor Pexaro, et in questo mezo resti il prefato sier Hironimo da Canal, governor di la quinquere monte, electo viceproveditor, con la sua galla fuora *ut in parte*, il qual proveditor parti in termine di 15 zorni *ut in parte*.

Et sier Zuan Antonio Venier andò in renga et parloe longamente. Li rispose sier Hironimo Grimaldi savio a Terra ferma, et disse come di la fusta Contarina, andò con l'orator del Signor turco, è falito 40 homeni. Et andò le parte: 6 non sinceri, 4 di no, 31 del Venier savio di Terraferma, et do di savii ai Ordeni, 151 di altri et quella fu presa.

209* Fu posto, per li Consieri, Cai di XL et Savii, dar per l'amor de Dio a monasteri di monache osservante di questa città stara 200 di formenti et farina, per seguir di tempo in tempo la laudabil consuetudine a laude de nostro Signor Dio. Ave 183, 7, 0.

Fu posto, per li Consieri, Cai et Savii, una parte non si trovando chi voi andar compagni su le galle di Fiandra, per esserli stà tolto la loro consuetudine del bocello, che soleano haver soldi 8 è reduti in 4, però sia preso che li ditti compagni habino soldi 8, come haveano per avanti *ut in parte*. Ave 181, 26, 3.

Fu posto, per li Savii ai Ordeni, che'l capitano di le galle di Fiandra sia confinato in galla a di 30 di questo, et debbi partir a di 3 avosto, sotto pena di ducati 500. Ave 183, 2, 0.

Fu posto, per li Savi del Conseio et Terra ferma, che atento nel castello di la chiusa di Venzon li compagni fosseno messi a pagar a la camera di Vienza per inadvertentia, pertanto sia preso che li ditti compagni 12 con el suo capo sia messi a pagar a la limitation *ut in parte*. Ave: 174, 1, 1.

Fu posto, per li Consieri, sier Hironimo Dolfin, sier Luca Navaier, Cai di XL, et per li Savii del Conseio, *excepto* sier Hironimo da Pexaro, et di Terra ferma *excepto* sier Giacomo Dolfin, elezer *de praesenti* di ogni loco et officio continuo uno orator al Christianissimo re di Franza, per alegrarsi di la liberation di fioli et di le noze, con cavali 11 et

4 stafieri, habbi al mese ducati 200 d'oro in oro, et questo per 4 mexi atento la spexa el convenirà far, il qual el vadi insieme con sier Zuan Antonio Venier electo orator residente apresso il re Christianissimo che starà lì e lui sarà electo torni indrio. Et sier Hironimo da chà da Pexaro savio del Conseio, in la qual intrò sier Beneto (*Francesco*) da Mosto cao di XL, voleno che l'orator habbi ducati *ut supra*, ma stando più di 4 mexi l'habi raxon di ducati 140 d'oro al mexe sicome ha sier Zuan Antonio Venier.

Et nota. Ditto sier Zuan Antonio Venier, qual è savio da Terra ferma, nulla volse meter per andar lui orator a star in Franza apresso il re.

Et sier Giacomo Dolfin savio a Terra ferma vol la parte di Consieri et Savii, con questo l'orator sia electo con pena, et habbi ducati 200 d'oro per 4 mexi solamente.

Andò le parte: 2 non sinceri, 5 di no, di Consieri et altri 35, et queste andò zoso, quella del Mosto et Pexaro ave 64, del Dolfin 90, et balotà queste do fo 72 del Mosto, 126 del Dolfin, et fu preso di farlo con pena.

*Scurtinio di un orator in Franza con pena, 210
justa la parte hora presa.*

Sier Gasparo Contarini el Savio del
Conseio, qu. sier Alvise . . . 87.105

Sier Piero Mocenigo fo proveditor
sora le Camere, di sier Lunardo
procurator, qu. Serenissimo . . . 88.109

Sier Francesco Donado el cavalier
savio del Conseio, qu. sier Alvise . . . 44.155

Sier Gasparo Bembo el dottor, di
sier Alvise . . . 61.143

† Sier Zuan Pisani procurator, qu. sier
Alvise procurator . . . 120. 82

non Sier Lorenzo Bragadin fo Consier,
qu. sier Francesco.

El qual sier Lorenzo Bragadin non bastò haver procurato tutto il Pregadi che'l non volesse, ma andò a la Signoria a dir che'l non poteva esser electo hessendo consier da basso, per le leze, *unde* li Consieri terminorono che'l non possi esser balotà; et fo mal fato, nè di raxon lo potevano far.

Et nota. Sier Zuan Pixani procurator vuol andar et procurava in Pregadi che'l fosse electo per do cause, l'una, per haver il possesso per il car-